

Ռեցիդիվ... այո՛

Ինչքան կարելի է նույն բանի մասին խոսել, առավել ևս՝ գրել, բայց անարդարացիորեն արդյունքի չհասնել: Այո, այդ պատահում է այն ժամանակ, երբ անտարբերությունը և անպատասխանատվությունը ձեռք-ձեռքի տված իրականացնում են ռեցիդիվ, բառիս բուն իմաստով:

Մենք մի ժամանակ, ինչ-որ չափով սովորել էինք, որ հանրապետական, նաև մյուս թերթերում տպագրված քննադատական հոդվածները քննության առնվեն և արդյունքի մասին հայտնի դարձվեն ընթերցողներին: Դեռ ավելին, այդ հարցում թերացողներին հրավիրում էինք պատասխանատվության: Ահա կյանքի կառուցման այս շատ կարևոր լծակը իսպառ մոռացության է տրվել, և մենք կանգնել ենք կատարված փաստի առաջ, ոչ ավել, ոչ պակաս մեր մշակույթի խոշորագույն կոթողի՝ Զվարթնոց տաճարի, այսպես ասած, «մասնակի վերականգնման» գործում:

Առնչված լինելով մեր ճարտարապետության հուշարձանների բախտի, մասնավորապես, Զվարթնոց տաճարի վերակազմության և նրա վերականգնման հնարավորության հարցերի հետ, տազնապում եմ հետևյալ առիթով: Հայտնի է, որ այդ հուշարձանի համար մեր դարի դեռևս առաջին տարիներին վերակազմություն է ստեղծել մեր արվեստի նվիրյալ, ճարտարապետ-գիտնական Թորոս Թորամանյանը: Իր ժամանակին նրա աշխատանքների նկատմամբ ուշադիր վերաբերմունք է ցուցաբերել պետերբուրգյան կայսերական ակադեմիայի համապատասխան բաժինը Անիի պեղումների հռչակված ղեկավար, ակադեմիկոս Նիկողայոս Մառի ներկայացմամբ:

Թ. Թորամանյանի աշխատությունների և չափագրությունների օգտագործմամբ ավստրիական համալսարանի համբավավոր պրոֆեսոր Հովսեփ Ստրժիգովսկին 1918 թվականին երկու մեծադիր հատորներով հրատարակում է «Հայ ճարտարապետությունը և Եվրոպան» աշխատությունը, որն իր հերթին մեծ ճանաչում է բերում մեր ժողովրդի շինարարական հանճարին: Ի ամոթանք մեր արվեստի և ճարտարապե-

տության համապատասխան հաստատությունների, այդ կոթողային աշխատությունը անցած երեք քառորդ դարի (75 տարի) ընթացքում թարգմանաբար չվերահրատարակվեց, և մեր ընթերցողները անտեղյակ մնացին նրա հույժ կարևոր բովանդակությանը:

Ասելիքս այն է, որ Թորոս Թորամանյանի նման մեծ գիտնականի և նրա շնորհակալ գործի, կոնկրետ դեպքում՝ Զվարթնոցի վերակազմության նկատմամբ անպատշաճ վերաբերմունքը առնվազն... դատապարտելի է:

Հետամուտ Զվարթնոցի «մասնակի վերականգնման» գործընթացին, որ տևում է արդեն տասնյակ տարիներ (երկու հերթում), նկատվել էր, որ սխալ է կատարվել՝ պատի մի հատված 90 սմ-ի փոխարեն շարվել է 210 սմ հաստությամբ: Այդպես էլ չհաջողվեց պարզել, թե այդ սխալի հեղինակը ով էր. ի վերջո, տարիներ անց հաջողվեց այդ սխալը շտկել: Մակայն այդ սխալին հետևեցին նորերը. ահա դրա մասին էր մեր մի հոդվածը, որ «Հայաստանի Հանրապետություն» թերթը տպագրեց 1992 թ. սեպտեմբերի 11-ի համարում: Դրանից մեկ տարի հետո՝ այժմ՝ 1993 թ. հոկտեմբերին կրկին անդրադառնում ենք նույն խնդրին: Անհագստացողն անհանգստանում է, թերթը՝ տպագրում, իսկ սխալ գործողները շարունակում են իրենց նոր սխալները քարոզ ու շաղախով իրականացնել... Զվարթնոցում:

Հիշածս հոդվածը վերնագրված էր «Մեծ հուշարձանի երկրորդ կործանումը». այն, կարծում եմ, բավական էր, որ համապատասխան կազմակերպությունները իրար անցնեին, տեսնեին ի՞նչ է տեղի ունեցել: Միավորված ազգերի կրթության, գիտության ու մշակույթի կազմակերպության՝ ՅՈՒՆԵՍԿՕ-ի կողմից հովանավորվող հուշարձանների թվում միայն Զվարթնոցն է ընդգրկված, որպես համաշխարհային նշանակության կոթող: Եվ ահա այդ հուշարձանի նոր կործանման մասին է ազդարարում ՀՀ Գերագույն խորհրդի օրաթերթը, բայց դրա կողքով անտարբեր են անցնում, այդ հարցը իրենց մոտ քննության առարկա չեն դարձնում ՀՀ Նախարարների խորհրդին առընթեր պատմության և մշակույթի հուշարձանների պահպանության և օգտագործման վարչությունը, Հայաստանի պատմության և

մշակույթի հուշարձանների պահպանության ընկերության խորհուրդը, Հայաստանի գիտությունների ազգային ակադեմիայի արվեստի ինստիտուտի ճարտարապետության բաժինը, Հայաստանի ճարտարապետների միության տեսության և պատմության սեկցիայի, ինչպես և Երևանի ճարտարապետական-շինարարական ինստիտուտի ճարտարապետության տեսության և պատմության ամբիոնը: Այստեղ պետք է հիշատակենք նաև նյութը հրապարակող թերթի բաժնին, որը այս ընթացքում պարզապես ի վիճակի էլ չեղավ հուշարձանների պահպանության և օգտագործման վարչությունից ստանալ բացատրություն իրենց գործունեությանը հասցեագրված քննադատական հոդվածի կապակցությամբ:

Անդրադառնալով ամենակարևորին, տեսնենք այդ ինչ սխալների մասին է, որ հոդվածագիրը այսպես աղմուկ է բարձրացնում, մի ամբողջ շարք պաշտոնյաների անտարբերության մեջ մեղադրում: Բանն այն է, որ հուշարձանում կատարվածը և կատարվողը չի կարելի լուրջ սխալ համարել, դա մեր գնահատմամբ ավելին է, դա, ըստ էության, կանխամտածված գործողություն է, ուղղված ոչ մեր արվեստի օգտին: Մենք գիտենք, որ Զվարթնոցում «մասնակի վերականգնման» անվան տակ ամեն գործողություն պետք է կատարվի Թորոս Թորամանյանի ճանաչված և պաշտոնապես ընդունված վերակազմության նախագծի սահմաններում: Այն, ինչը իրականում արվում է, դեմ է այդ նախագծին: Արվում է բազմիցս քննադատված և որպես վերակազմություն մերժված այն նախագծով, որը տարիներ առաջ ներկայացրել էր ԳԱԱ արվեստի ինստիտուտի ճարտարապետական բաժնի այն ժամանակվա վարիչ Ստ. Մնացականյանը:

Այժմ հուշարձանում արվում է այնպես, ինչպես չպիտի արվեր: Ցավալի է, որ տեղի է ունենում անթույստրելիք. այդ այն է, ինչը օրենքով սահմանված է՝ որ եթե հուշարձանում որևէ հարց պարզ չէ, կամ վիճարկման առիթներ է տալիս, ապա այդ հանգույցին չի կարելի կայչել, մինչ, կոնկրետ դեպքում «մասնակի վերականգնողները» ոչ միայն կպչում են, այլ ձևափոխում են հենց այդպիսի հանգույցներ, և քանի որ պահպանված որոշ մասեր խանգարում են այդ ձևափոխություններին, մետաղյա

գործիքներով այդ մասերը քանդում են, համապատասխանեցնում իրենց նպատակադրմանը: Սա արդեն ենթակա է երիցս դատապարտման: Այսպիսի դեպքերում մեղավորները կանչվում են դատական պատասխանատվության, սխալը վերացնելուն ուղղված բոլոր միջոցառումների հետ կապված ծախսերը գանձվում պատասխանողից:

Տարիներ առաջ գոյություն ուներ հուշարձանների վարչության գիտամեթոդական խորհուրդ, որտեղ քննարկվում էին նման հարցեր. այժմ հայտնի չէ, գործու՞մ է այն, թե՞ ոչ, համենայն դեպս, խորհրդի նիստերին սովորաբար հրավիրվող «դրսի» մասնագետները անտեղյակ են այդ ամենին: Չեմ կարծում, որ Կորյուն Ղաֆադարյանը կարդացած չլինի իր հոր՝ անվանի գիտնական Կարո Ղաֆադարյանի հրապարակված կարծիքը մնացականյանական «մասնակի վերականգնման» մասին, որ խիստ բացասական է (տես՝ Հայկ. ՍՍՌ ԳԱ «Տեղեկագիր» (Հասարակական գիտություններ), 1958, թիվ 7): Չեմ կարծում նաև, որ վարչության պետի տեղակալ Վ. Գրիգորյանը չգիտե Ստ. Մնացականյանի վերակազմության մերժված լինելու մասին: Կարևորն այն է, որ վարչության ղեկավարները գործը վարում են, ըստ երևույթին, խորհրդատու ունենալով չնախընտրված վերակազմության հեղինակին: Արդյունքում տեղի է ունենում անթույլատրելի ռեցիդիվ՝ պետական ահագին միջոցներ են հատկացվում որոշակի մի բան անելու, արվում է մի ուրիշը: Սրա համար ոմանք ամպայմանորեն պետք է կանչվեն պատասխանատվության: Իսկ հուշարձանը, այնուամենայնիվ, պետք է փրկել, իրոք կործանումից, անմիջապես, առանց ժամանակ կորցնելու:

ՏԻՐԱՆ ՄԱՐՈՒԹՅԱՆ

**ՀՀ վաստակավոր շինարար, ճարտարապետության
դոկտոր, ճարտարապետության համաշխարհային
բիենալեի (1991) դափնեկիր**

«Հայաստանի Հանրապետություն», 3 հոկտեմբերի 1993 թ., էջ 6: